

Realan plan djelovanja



Građani trebaju napraviti razliku između kandidata i stranačkih lidera koji se, s jedne strane, fokusiraju na pritužbe i, s druge strane, onih koji se fokusiraju na realistična rješenja, napisao je visoki predstavnik i specijalni predstavnik EU Valentin Inzko u kolumni koja je jučer objavljena u domaćim medijima.

On je rekao da će izbori koji će se održati 3. oktobra odlučiti između ove dvije opcije i da će “samo građani koji glasaju – a ne oni koji ostanu kod kuće – odlučiti ko će voditi zemlju u naredne četiri godine.”

Visoki predstavnik i specijalni predstavnik EU je konstatirao da do sada prioriteti građana nisu bili u centru izborne debate. “Građanima je stalo do desetina hiljada radnih mjesta izgubljenih u protekloj godini”, napisao je. “Građanima je stalo do rješavanja političke i administrativne korupcije, građanima je stalo do socijalnih usluga koje su na katastrofalno lošem nivou, te do rješavanja pitanja prekomjernog trošenja na administraciju i problema kriminala koji je u porastu.”

Za političke stranke, prioritet bi trebalo biti pronalaženje konstruktivnih rješenja upravo za ove izazove. “Glasači ne žele prozivanja i uvrede. Oni žele realan plan djelovanja”, naglasio je visoki predstavnik i specijalni predstavnik EU.

Puni tekst uvodnika visokog predstavnika/specijalnog predstavnika EU se može naći na web stranicama www.ohr.int i www.eusrbih.eu